



Mo en Svizra sgulan gia passa 100000 dronas per il tschiel enturn.

FOTO BRIKARUS/CC BY-SA 2.0

«Salvar vitas cun dronas»

Il Grischun Romeo Durscher è in dals megliers experts da dronas sin quest mund. E plinavant ha el era gia lavurà tar la NASA. La fin d'avust è el stà giast al forum d'economia a Cuira.

GIAN CARLO CANDINAS/RTR

Ozendi datti strusch ina persuna che chape-scha dapli da dronas che *Romeo Durscher*. El vala sco in dals visiunaris en la scena da dronas. Romeo Durscher – in um da Domat ch'è i cun 22 onns en ils Stadis Unids da l'America per far là carriera. Suentar ina carriera tar la NASA èn las dronas dapi intgins onns la gronda passium dal Grischun. En ils Stadis Unids fila el vi da visiuns per il futur. El di envers RTR davart sia finamira a lunga vista: «Mia visiun è da salvar vitas e da salvar bajetgs cun dronas.»

13 onns tar la NASA

Suentar ses emprendissadi sco commerziant tar ina banca è el emigrà cun 22 onns en ils Stadis Unids nua ch'el ha tranter auter lavurà 13 onns tar la NASA. Actualmain lavura el tar la firma Auterion che sviluppescha software per dronas.

Sche Romeo Durscher discorra da dronas è el en ses element. Avant radund 10 onns ha el sgulà per l'emprima giada ina drona. Immediat l'ha quest object fascinà ed el ha decis da vulair lavurar en l'industria da dronas. Actualmain è il Grischun engaschà tar la firma Auterion, ina firma che sviluppescha software per dronas. Là è el responsabel per la segirtad publica.

Il Grischun lavura per exempel vi da proceduras nua e co las dronas pudessan esser in agid en differents secturs. Per exempel tar ils pum-piers. «Sch'ils pum-piers survegnan il telefon ch'i brischa, duess la drona ir automaticamain da la staziun da pum-piers al lieu d'incendi per rimnar infurmaziuns e forsa gia cumenzar a stizzar il feu.» In'otra finamira saja er che dronas duessan en il futur vegnir duvradas pli e pli savens per chattar persunas.


Romeo Durscher vesa tranter auter potenzial per regiuns muntagnardas sco il Grischun – e numna in exempel: «Nus avain p.ex. ina rait enorme da lingias d'auta tensiun. Quellas van sur muntognas e flums. Da controllar e survegliar quellas lingias è in'incumbensa difficila. I dovra helicopters ed ils spezialists han dad ir sin las pitgas. Quai è privlus. Qua pudessan nus simplifitgar la lavur cun las dronas e render pli effizienta la lavur.»

Las dronas portan er privels

Il diever da dronas è en mintga cas creschent. Ina statistica dal 2019 fa quint ch'i dettia mo en Svizra var 100000 dronas. En il fratemp datti probablmain anc dapli.

Ma tut quai ch'è nov porta era privels. Da quai è Romeo Durscher conscient. El di: «Il carstgaun ha il dun da duvrar chaussas per intents che n'eran betg planisads.»

La drona è ozendi er in'arma da guerra. Millis da morts hai gia dà en guerras pervi d'attagas cun dronas. In'auter privel è er la surve-



Ha fatg la classica carriera da «la stalla a las stailas» – ha bandunà Domat, ha vendi en l'America pop-corn en in kino ed è ussa in expert da renum sin il champ da svilup da dronas: Romeo Durscher.

FOTO MAD

«Il carstgaun ha il dun da duvrar chaussas per intents che n'eran betg planisads.»

Romeo Durscher, expert da dronas

glianza totala da persunas. Quai sajan grondas sfidas, manegia era Romeo Durscher, sch'ins guardia l'aspect negativ da las dronas. Er datti adina pli savens accidents cun dronas, cunquai che adina dapli dronas èn en l'aria.

Las dumondas che sa tschentan cun tut il svilup tecnologic da las dronas fatschenta era il sviluppader. Romeo Durscher di perquai: «Sco societad stuain nus schon sclerir, co nus pudain garantir ina sfera privata, tge che dronas das-tgan insumma far e vesair. I dat bain gia leschas en quel connex. Però nus stuain lavurar vinvant vidlonder, perquai che la tecnologia sa sviluppescha svelto.»

Avant las dronas ha la NASA clamà

Romeo Durscher è ina persuna ch'ha adina vivi per ses siemis. Gia da pitschen era el fascinà da tut ils objects che sgulan. Suentar ch'el ha persequità il 1986 sco giuven buob l'accident da la navetta spaziala Challenger ha el ditg a sa-sez: «In di lavur jau tar la NASA». Igl è stà in mument che ha influenzà il giuven da Domat.

Cun 22 onns ha el gudagnà ina «Greencard» ed è emigrà il 1997 en ils Stadis Unids. Suentar ch'el ha lavurà in temp en in kino e suenter en la branscha da computers en il Silicon Valley, è ses siemi vegnì realitad il 2002. Grazia a contacts ha el intervegnì che la NASA tscher-tgava persunas per in nov project. El ha empruvà ses cletg ed ha propi survegnì la piazza. Durant bunamein 13 onns è el stà manader da project tar la NASA. Durant quest temp ha el bajegià in satellit che observa il sulegl. Suentar han las dronas «clamà» el.